

Conrector di Colegio Arubano Playa, Sra. Cameron

Claro cu nos ta desapunta e aña aki tambe



ORANJESTAD- Hopi reaccion a lanta despues cu a bira conoci cu e cantidad di studiantenan cu a slaag ta menos e aña aki compara cu aña pasa na Colegio Arubano.

Conrector di Colegio Arubano Oranjestad, Sra. Cameron, a bisa cu di un banda nan ta comprende e tipo di reaccion of critica cu e resultado aki ta lanta, ya cu tin mayor cu ta hopi tristo pa motibo cu e yiu no a slaag. Pero di otro banda e ta haya cu cada un di nos mester check e realidad, esta kico bo yiu mes a haci pa logra esaki, y kico e no a haci tambe. Pero tambe e yiu mes mester admitti si realmente el a traha duro si of no. E tin cu bisa cu lastimamente nan por a observa cu durante temporada di vakantie di Pasco tabatin studiantenan cu no a dedica nan mes na trabou di scol, manera mester ta den un examen klas.

Evaluacion y preparacion
Conrector di Colegio Arubano Oranjestad a indica cu como scol nan tambe ta auto evalua kico nan a haci fout y kico como scolnan nan por

drecha, ya cu esakinan ta aspectonan importante.

"Nos ta purba como scol laga nan traha, papia cu nan mayornan, papia cu nan mes, pero na final nan mes mester haci esey como estudiante", el a declara na Bon Dia Aruba ayera.

El a añadi cu si e estudiante no ta dedica suficiente tempo pa prepara su mes, ya cu den un examen klas, no por ta asina cu e estudiante ta bisa na cas cu no tin huiswerk. "Pasobra den un examen klas cada dia bo mester studia, bo mester prepara adelanta", el a bisa.

El a pone como ehemplo cu si un estudiante tin un examen na fin di october, e estudiante mester cuminsa prepara na mita di augustus caba. Tur estudiante ta haya sa cu tempo, tur cos cu ta importante pa e tene cuenta cun'e durante su examen pa henter aña.

Tur cos ta programa por ehemplo ki tempo e estudiante mester bin cla cu cada buki pa lesa, y ki dia lo tin examen. E no ta haya corecto cu un estudiante ta cuminsa prepara su mes un dia prome cu examen, ya cu por lo menos bo mester cuminsa prepara cin-



co pa seis siman prome, pa e estudiante por keda cla cu tur cos na ora, y pa e por haya su puntonan manera mester ta.

Auto evaluacion

Como institucion tambe nan ta evalua nan mes riba e resultadonan di cada examen. Sra. Cameron a bisa cu despues di e resultadonan di

e Examen por escrito central (CSE) nan tambe ta evalua esaki internamente. "Claro cu nos ta desapunta e aña aki tambe, pasobra compara cu aña pasa el a baha hopi", el a bisa.

Na 2014, Colegio Arubano Oranjestad tabatin 81% di studiantenan di VWO cu a slaag, y e aña aki e cifra a

baha te cu 58%. Aña pasa pa HAVO tabatin 70% di studiantenan cu a slaag, y e aña aki a baha te cu 43%. Naturalmente nan ta decepciona cu e resultado aki y nan ta bay evalua y check tambe kico nan por haci.

Nan ta consciente cu tabatin un par di examen cu tabata dificil tambe manera Hulandes, Economia y Kimica. Tambe nan ta observa cu tin añanan mas malo cu otro, y e aña aki tabata un di nan cu e porcentahe tabata hopi abou. "Nos ta check kico nos por drecha tambe", el a declara.

Otro aña conrector di Colegio Arubano Oranjestad ta bay check kico nan por drecha specialmente loka tin di haber cu actividad scol cu ta tuma lugha durante e ultimo dianan di scol prome cu examen. □